

17. maj 2006

UKIU 2006/10

**Aningaasarsianit akileraarutit pillugit Inatsisartut inatsisaata
allanngortinneqarneranik Inatsisartut inatsisissaattut siunnersuut**
(Inuit umiarsuarni ilaasunik angallassissutini, Akileraartarnermut Pisortaqarfiup
umiarsuarni inuttat akissarsiaasa akileraarutitaat pillugit aaqqissuussinermut
nalunaarsuiffiani nalunaarsorsimasut sulisutut akissarsiaqartut pillugit
aaqqissuussineq)

pillugu

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISUTAA

Siunnersuutip aappassaaneerreqarnerani saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Augusta Salling, Atassut, siulittaasoq
Inatsisartunut ilaasortaq Agnethe Davidsen, Siumut, siulittaasup tullia
Inatsisartunut ilaasortaq Agathe Fontain, Inuit Ataqtigiit
Inatsisartunut ilaasortaq Lars Emil Johansen, Siumut
Inatsisartunut ilaasortaq Lene Knüppel, Demokraatit
Inatsisartunut ilaasortaq Jens Lars Fleischer, Siumut - Sinnisussaq

Akileraartarnermut Akitsuusiisarnermullu Ataatsimiititaliap UKIU 2006-imi
siullermeerinerup kingorna inatsisissatut siunnersut matumani pineqartoq
nassuiaatitaalu misissuataarpai.

Siunnersuutip imarisaa

Umiarsuarsuit takornarianik angallassillutik ingerlaartut imaluunniit ilaasunik nalinginnaasunik takornarianillu ilaasoqarlutik ingerlaartut inuttaasa akissarsiaqartinneqarsinnaanerannut periarsiffiinissaq siunnersuutikkut matumuuna Naalackersuisut kissaatigaat.

Ilaasunik nalinginnaasunik takornarianillu ilaasoqarluni ingerlaarneq tassaavoq umiarsuaq ilaasunik angallassissut atorlugu takornarianik, angalanernut ataatsimut aaqqissuuteriikkanut Danmarkimiit, Savalimmiuniit nunanilluunniit allaniit aaqqissuussanut atatillugu timmisartumut aammalu umiarsuarmut billetsimik pisisimasunik, aamma maani nunaqartunik Kalaallit Nunaata iluani umiarsuakkut angalanissaannarmik kissaateqartunik ilaasoqarluni aalajangersimasunik ingerlaarfeqarluni angallassineq.

Arctic Umiag Line-p umiarsuaataasa arlallit Arctic Travel Group-imut (ATG) 1. april 2006 aallarnerfigalugu tiguneqartussanngorlugit november 2005-imi tunineqarnerat siunnersuummut toqqammaviuvoq. Umiarsuarni pigineqalersuni inuttaasut akissarsiaasa akileraaruserneqartarnelernissaannik Kalaallit Nunaanni aaqqissuussisoqarnissaa naatsorsuutigalugu tunisinermi pisisumut akigitinneqartoq aalajangersarneqarsimavoq.

Umiarsuarni assartuutini ilaasartaatinilu Danmarkimi nunat tamalaat akornanni nalunaarsuiffimmiittunut inuttaasut akissarsiaasa tunniunneqartarnerannut immikkut tunngavissaatitasunik peqareerpoq, tak. aningaasarsianit akileraarutit pillugit inatsimmi § 34 a.

Tusarniaanermi akissutit

Akileraartarnermut Akitsuusiisarnermullu Ataatsimiititaliaq siunnersuutip matumani pineqartup suliarineqarnissaanut atugassatut tusarniaanermi akissutit nuutinneqarnerinik pissarsiniarsimavoq. Siunnersuut ulloq 17. december 2005-imi ulloq 21. december 2005-imi akissuteqarfigineqartussatut tusarniaassutit nassiunneqarpoq.

Tusarniaavigineqarsimasut arlallit piffissaq tusarniaavigineqartoq sivikippallaarsimanerarsimammasuk ataatsimiititaliap maluginiarpaa. Inatsisartunik nutaamik qinersisoqarnera pissutigalugu inatsisissamik piareersaallutik sulinissamut Naalackersuisut piffissakippallaarsimasut Akileraartarnermut Akitsuusiisarnermullu Ataatsimiititaliap paasisinnaagamiuk piffissaq tusarniaavisoq sivisunerusinnaasimangimmat ataatsimiititaliap pitsaanngitsutut isigaa. Tusarniaavigineqartut tusarniaanermi atortunik misissuinissamut naammaginartumik piffissaqartillugit tusarniaanermut piffissaliussat ataatsimut isigalugit sivisussulernerneqartassatut ataatsimiititaliap Naalackersuisunut inassutigissavaa, taamaattoqanngikkaluarpammi tusarni-aanissap siunertaa anguneqanngitsuussammat.

Siunnersuutip matumani pineqartup Inatsisartut ataatsimiittarfianni siullermeerneqarnera tunngavigalugu Kalaallit Nunaanni Sulisitsisut Peqatigiiffiat

(GA), sulisitsisut peqatigiiffiat ILIK aamma Arctic Umiaq Line/ATG Naalakkersuisunit qinnuigineqarput inatsisisissatut siunnersuummut oqaaseriumasinnaasaminnik saqqummeequllugit. Akileraartarnermut Akitsuusiisarnermullu Ataatsimiititaliamit saaffiginnineq tunngavigalugu taakku assinginiq saaffiginnissutit SIK-mut APK-mullu nassiunneqarsimapput. Oqaaseqarfiginninnertut pissarsiarineqartut ataatsimiititaliami suliarinninnerup nalaani annertuumik oqaaseqarfiginninnissamut pissutissaqartitsisimangillat.

Kiisalu siunnersuut una akileraatutinit iluanaarutit kommunit pissarsiassaasa appariartinneqarnerannik nassataqassappat ataatsimoortumik tapiissutit isumaqatigiinninniutiginissaanni kommunit sinnerlugit peqatigiiffik taarsiiffigineqarnissamik piumaqarniarloq KANUKOKA-p tusarniaanermut akissuteqarnermini oqaatigisaa Akileraartarnermut Akitsuusiisarnermullu Ataatsimiititaliamit maluginiarneqarpoq. Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit (UKIU06/11) naatsorsuutigineqartutut qaffanneqarnerisigut nunatta karsiata ilaatigut aningaasatigut eqqornerlunneqartussaagunangimmat KANUKOKA-p piumasagaataa tunngavissaqarunartoq Akileraartarnermut Akitsuusiisarnermullu Ataatsimiititaliaq isumaqarpoq. Kommunilli iluanaarutinit annaasaat KANUKOKA-p Naalakkersuisullu akornanni ataatsimut tapiissutit isumaqatigiinninniutiginissaannut ilaasussaasut Akileraartarnermut Pisortaqrarfiup ulloq 24. februar 2006 ilisimatitsissutigimmagu apeqqutip iliuseqarfigeqqinnissaa tunngavissaqanngitsoq ataatsimiititaliaq isumaqarpoq.

Siunnersuuttip aningaasatigut sunniutissai

Siunnersuut una pisortat karsiinut ukiumut 5 mio. kr.-inik isertitassanit annaasaqaataassasoq Naalakkersuisut naatsorsuutigaat, ima agguataarneqarlutik, Nunatta karsianut 1,3 mio. kr.-it kommuninullu 3,7 mio. kr.-it.

Umiarsualivimmiinnermut aamma umiarsuit takornarianik angallassissutit ilaasunik angallassinerannut akileraarutit (UKIU06/11) allanngortinneqarnissaannik Naalakkersuisut siunnersuutaat aamma Inatsisartunit akuersissutigineqassappat, ukiumoortumik isertitassanit iluanaarutit 4,3 mio. kr.-inik amerleriassasut naatsorsuutigineqarmat pisortat karsiisa ukiumoortumik iluanaarutinit annaasaqaatissaat katillugit 700.000 kr.-iunissaat naatsorsuutigisariaqarpoq.

Akileraartarnermut Akitsuusiisarnermullu Ataatsimiititaliap inassuteqaataa

Siunnersuut akuersissutigineqassasoq **ataatsimiititaliap isumaqatigiittup inassutigaa.**

Taama oqaaseqarluni Inatsisartut Akileraartarnermut Akitsuusiisarnermullu Ataatsimiititaliaata siunnersuut aappassaaniigassanngortippaa.

Augusta Salling,

Siulittaasoq

Agnethe Davidsen

Agathe Fontain

Lars-Emil Johansen

Lene Knüppel